

Inatsisissatut siunnersuummut nassuiaatit

Nalinginnaasumik nassuiaatit

1. Aallaqqaasiut

Siunnersuuteqarnikkut siunertarinearpoq sinerissamut qanittumi aalisariutit ilaasa qaleralinniartut aqqissuussaanerisa naleqqussaavigineqarnissaanik qulakkeerinninnissaq.

Siunnersuutip nassataraa aalisarnej pillugu Inatsisartut inatsisaanni atuuttumi § 15-imi aalajangersakkamik nutaamik ilanngussineq, sinerissamut qanittumi qaleralinniarnermi inunnut ataasiakkaanut pisassiissutit tuniniarneqarsinnaasut atulersinneqarnerisa kingunerisaannik pisassiissutit qummut killissaanik atulersitsinissaq siunertaralugu.

Siunnersuuteqarnikkut sinerissamut qanittumi qaleralinniarnermi inunnut ataasiakkaanut pisassiissutinik tuniniarneqarsinnaasunik (IOK-nik) aqqissuussineq ikorfartorneqarpoq, tungavilersuutigineqarlunilu aqutsiveqarfinni Upernavimmi, Uummannami Qeqertarsuullu Tunuani aqqissuussinikkut ajornartorsiuteqarneq pissutigalugu ilaatigut aalisarnermi tassani aalisartut ilaasa isertitaasa appasingaatsiarnerannik kinguneqartumik. Siunnersuut aalisagaqassutsip tatineqarsimaneramik oqilisaaviginninniarluni suliniutit Naalakkersuisunit naleqqututut isigineqartut ilaatut aamma isigineqassaaq.

Siunnersuut IOK-mik aqqissuussinermik atulersitsinermut ilagitillugu ilusilersorneqarsimavoq, qaleralinniarnermik aqutsineq pillugu pilersaarut Aalisarnermut, Piniarnermut Nunalerinermullu Naalakkersuisoqarfimmi suleqatigiissitaliap soqutigisallit susasaqartut suleqatigalugit suliarisimasaa tunngavigalugu. Aqutsinissamik pilersaarut taanna suliniutinut erseqqis-sunut Naalakkersuisut nunap immikkoortuinik ineriartortitsinermi periaasiannut (RUS-imut) aallartinneqareersumut ilaavoq.

2. Siunnersuummi immikkoortut pingaarnertit

Siunnersuut sinerissamut qanittumi qaleralinniarnermi inunnut ataasiakkaanut pisassiissutinik tuniniarneqarsinnaasunik aqqissuussinermut Namminersorlutik Oqartussat akuersissutit pisassiissutillu pillugit nalunaarutaanut nr. 1, 2. februar 2012-imeersumut aamma Namminersorlutik Oqartussat sinerissamut qanittumi qaleralinniarneq pillugu nalunaarutaat nr. 2, 2. februar 2012-imut qanittumik attuumassuteqarpoq.

Nalunaarutit taakkua atuutilersinneqarnerisa nassataraat qaleralinnik pisassiissutinik pigisaqartut pisassiissutinik aalisariutit pineqartut atugassaannik inatsisinik unioqqutitsinatik nioqquteqarsinnaalernerat.

Naalackersuisut tamatumunnga atatillugu isumaqarput aalisarnermi tassani pisassiissutit aalisartut pigisinnaasaasa qummut killissalernerqarnissaat pisariaqartoq.

Nalinginnaasumik ilisimaneqarpoq pisassiissutinit nammineq pigisanik niuerutigineqarsinnaasunik aalisarnermi aalajangersimasumi atuutilersitsineq pisassiissutit pisinnaasaqarluartunut katersuunneqarnissaannik kinguneqarsinnaasoq.

Siunnersuutip nassatarisaanik § 15 atuuttoq annertusineqassaaq, tamatumalu kingunerisaanik ingerlatseqatigiiffiit inuilluunniit ataasiakkaat sinerissamut qanittumi qaleralinniarnermi pisassiissutininik pisinikkut pisassiissutit 5 %-ii sinnerlugit pigisaqarsinnaanerat inertequtaassaaq.

Naalackersuisut naliliipput taamaaliornikkut piginnittut pigisaasa aalisartunut amerlanerusunut siammarneqarnissaat qulakkeerneqassasoq, tamatumunngali peqatigitillugu aalisarnermi immikkoortunik aningaasaqarnikkut akilersinnaasunik pilersitsoqarsinnaanera qulakkiissallugu.

Ilanngunneqassaartaaq inatsisissatut siunnersuutikkut peqatigitillugu aalisarneq pillugu inatsimmi § 33 imm. 1 atuuttoq iluarsineqassammat.

Aalisarneq pillugu Inatsisartut inatsisaanni atuuttumi pisassiissutininik killiliilluni aalajangersakkanik unioqqutitsinerit allat (§ 15, imm. 3 aamma 4) § 33 imm. 1 nr. 1 naapertorlugu akiliisitaanermik pineqaatissiissutaasinnaapput.

Siunnersuutigineqarpoq sinerissamut qanittummi raajarniarnermi pisassiissutinit pigineqarsinnaasunik qummut killigititamik inatsisissatut siunnersuummi aalajangersakkamik (§ 15, imm. 5) unioqqutitsineq taamatuttaaq akiliisitaanermik pineqaatissiissutaalersinnaassasoq.

3. Pisortanut aningaasatigut allaffissornikkullu kingunerisassai

Naatsorsuutigineqarpoq inatsisissatut siunnersuut akuerineqarpat tamanna siunissaq ungasinerusoq eqqarsaatigalugu aalisartunut pineqartunut akuersissutit ikilinerannik nassataqassasoq.

Naalackersuisoqarfiup nalilerpaa inatsisissatut siunnersuut pisortanut ajortumik kinguneqassanngitsoq.

4. Inuussutissarsiornermut aningaasatigut allaffissornikkullu kingunerisassai

Naliliisoqarpoq allannguutissatut siunnersuut inuussutissarsiuteqartunut allaffissornermik annertunerusumik nassataqassanngitsoq ajornerusumilluunniit kinguneqartitsinaviannngitsoq.

Pisassiissutit 5 %-imik qummut killilerneqarnerisa pisassat 490 tons miss. annertoqatigaat, naalackersuisoqarfiullu tulaanneqartartut kisitsisaatigineqartut naapertorlugit naatsorsuinerisigut takutinneqarpoq, angallatilluunniit anginerit pisarisartagaat 300 tonsinit appasinnerusut.

Taamaattumik pisassiissutit 5 %-imik qummut killilerneqarneri inuussutissarsiummik akilersinnaasumik ingerlatsisinaanissaq eqqarsaatigalugu naleqqulluurtutut isigineqarpoq.

5. Avatangiisinut, pinngortitamut innuttaasullu peqqissusiannut kingunerisassai

Inatsisissatut siunnersuutip avatangiisinut, pinngortitamut innuttaasullu peqqissusiannut pitsaanngitsunik sunniuteqarnissaa ilimagineqanngilaq.

6. Innuttaasunut kingunerisassai

Naalackersuisoqarfik naliliivoq inatsisissatut siunnersuut innuttaasunut allaffissornerunermik nassataqassanngitsoq.

Innuttaasunut aningaasatigut kingunerisassai immikkoortumi 4-mi saqqummiunneqarput.

7. Kingunerisassat pingaarutillit allat

Naatsorsuutigineqanngilaq inatsisissatut siunnersuut allanik pingaarutilinnik kinguneqartitsisasooq.

8. Oqartussaasunut suliniaqatigiiffinnullu il.il. tusarniaaneq

Siunnersuut Nunanut Allanut Pisortaqaarfimmut, Aatsitassanut Pisortaqaarfimmut, Sulisoqarnermik Aningaasaqarnermillu Aqutsisoqarfimmut, Isumaginninnermut Naalackersuisoqarfimmut, Peqqissutsimut Naalackersuisoqarfimmut, Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfimmut, Ineqarnermut, Attaveqarnermut Angallannermullu Naalackersuisoqarfimmut, Akileraartarnermik Aqutsisoqarfimmut, Inuussutissarsiornermut Suliffeqarnermullu Naalackersuisoqarfimmut, Nunami Namminermi Pissutsinut, Avatangiisinut Pinngortitamullu Naalackersuisoqarfimmut, Kalaallit Nunaanni Aalisarsinnaanermut Akuersissutinik Nakkutilliisoqarfimmut, Grønlands Kommandomut, Politimestereqarfimmut, Pinngortitaleriffimmut, Sulisitsisut Peqatigiiffiannut, KNAPK-mut, SIK-imut, NUSUKA-mut, KANUKOKA-mut, DG-Fishimut, Grønlandsbankenimut, Sparbank Vestimut, Polar Seafoodimut Royal Greenlandimillu tusarniutigineqarpoq.

Tusarniaassummut akissuteqarput Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfik, Inuussutissarsiornermut Suliffeqarnermullu Naalackersuisoqarfik, Nunami Namminermi Pissutsinut, Avatangiisinut Pinngortitamullu Naalackersuisoqarfik, KNAPK, Sulisitsisut Peqatigiiffiat, Grønlandsbanken, Qeqqata Kommunia kiisalu Qaasuitsup Kommunia.

Aallaqqaasiutigalugu ilisimatitsissutigineqassaaq tusarniaanernit akissutit tiguneqartut inatsisip oqaasertaanik nassuiaatinilluunniit allanngortitsinissamat tunngavissaqartitsilinnimmata, KNAPK-p pisassiissutinik toqqaannanngitsumik toqqaannartumillu pigisaqarnermi Aalisarnermut, Piniarnermut Nunalerinermullu Ataatsimiititaliap inassutigisimasai pillugit oqaatigisimasai eqqaassanngikkaanni.

Tusarniaavigineqartut akissutaat

KNAPK-p isumakulunnartoqartippaa pisassiissutit pigineqartut siunissami toqqaannartumik toqqaannangitsunillu pigineqarnerat aallaavigalugu naatsorsorneqartarnissaanik Aalisarnermut, Piniarnermut Nunalerinermullu Ataatsimiititaliap inassuteqaataata naalackersuisoqarfimmit malinneqarsimannginnera.

Tamatuma kingorna oqaaseqaatip taassuma oqariartuutitai inatsisissatut siunnersuummut naalackersuisoqarfimmit ilanngunneqarput.

Sulisitsisut Peqatigiiffiat isumaqarpoq pisassiissutit 5 %-imik qummut killilerneqarneri immi-
nut akilersinnaasumik aalisarsinnaanissamut naammanngitsoq. Sulisitsisut Peqatigiiffiata ta-
matuma saniatigut ujartorpaa umiatsiaararsornermit aalisariuteqalernermut ikaarsaariarnermi
qanoq isilluni aqqissuussisoqarsinnaassanersoq.

Grønlandsbankenip oqaatigaa pisassanik killiliinissamik siunnersuut Naalackersuisut patajaal-
lisaanissamik nutarterinissamillu suliniutaannut killiliisinnaasoq. Sulisitsisut Peqatigiiffiat
assigalugu aningaaserivik isumaqarpoq umiatsiaararsortut aalisaariutitut ikaarsaariartinnis-
saanut aqqissuussisinnaanissat eqqarsaatigineqartariaqartutaaq.

Sulisitsisut Peqatigiiffiat aamma Grønlandsbanken assigalugit Inuussutissarsiornermut Sulif-
feqarnermullu Naalackersuisoqarfik isumaqarpoq pisassiissutit 5 %-imik qummut killilerne-
qarnera appasippallaartoq.

Qaasuitsup Kommuniata tusarniaanermi piffissaliunneqartup sivisunerusariaqarnera oqariar-
tuutigaa, Kommunimi isumaqarmat tusarniaanermi akissutit sap.ak. sisamat ingerlanerani
akineqartussanngortinneqarnerat sivikippallaartoq.

Tusarniaanermi akissutit sinnerini inatsisissatut siunnersuutip imarisai oqaaseqarfigineqan-
gillat. Tusarniaanermi akissutit ilanngunneqartut innersuussutigineqarputaaq.

Aalajangersakkat ataasiakkaanut nassuiaatit

§ 1-imut

Nr. 1-imut

Inatsit sinerissap qanittuani qaleralinniarnermi angallatinut 6 meterinit anginerusunut atuup-poq. Siunnersuutip kingunerisaanik sinerissap qanittuani qaleralinniarnermi pisassiissutit tuniniarneqarsinnaasut tamarmiusut 5 %-ii annertunerpaamik pigineqarsinnaapput.

Raajarniarnermi periusigineqartunit allaaneraluni sinerissap qanittuani qaleralinniarnermi pisassiissutit pigineqartut toqqaannangitsumik toqqaannartumillu pigineqartutut naatsorsorneqartassapput.

Aalajangersakkap taassuma atorneratigut, tamatuma kingunerissavaa siunissamik isigisumik pisassiissutinik pigisaqartoqartalissammat ingerlatseqatigiiffiit inuilluunniit ataasiakkaat ingerlatseqatigiiffiup pisassiissutinik piginneqataassutaanik imaluunniit pineqartup piginneqataassutaanik piginneqataassutiviit tunniunneqartalerneratigut, tassani ingerlatseqatigiiffik inuilluunniit ataasiakkaat piginneqataassummik taamak ittumik piffimmi ataatsimi aaqiivigineqartussami peqartillugit, assersuut 1 takujuk. Pissusiviusulli aallaavigalugit ingerlatseqatigiiffik inuilluunniit ataasiakkaat ingerlatseqatigiiffimmut allamut tunngatillugu aalajangersimarpaluttumik sunniuteqartalerpata, ingerlatseqatigiiffiup allap pisassiissutaatai inummut piginnittuusumut ingerlatseqatigiiffiulluunniit piginneqataassutaataannut ilanngunneqassapput, assersuut 2 takujuk.

Assersuut 1: Ingerlatseqatigiiffik, inuilluunniit ataasiakkaat, AA imartani aqutsiviusumi pisassiissutinik pigisaqartillugit, kiisalu ingerlatseqatigiiffimmik BB-mik 25 %-mik piginneqataalluni, kisiannili AA ingerlatseqatigiiffimmi BB-mi imartami aqutsiviusumi tassanerpiaq 10 %-imik pisassiissutinik pigisaqartumi, naammattumik aalajangiisinnaassuseqanngippat, AA-p piginneqataassutai aammalu AA-p BB-ip pisassiissutinit pigisaanit (2,5 %-iusunit) piginneqataassutai tamakkerlutik killiliussat aalajangersarneqarsimasut sippussanngilaat.

Assersuut 2: Ingerlatseqatigiiffik, inuilluunniit ataasiakkaat, AA piffimmi aaqiiffigineqartussami pisassiissutinik pigisaqartillugit, kiisalu ingerlatseqatigiiffimmik BB-mik 25 %-mik piginneqataalluni, kisiannili AA ingerlatseqatigiiffimmi BB-mi imartami aqutsiviusumi tassanerpiaq 10 %-imik pisassiissutinik pigisaqartumi, naammattumik aalajangiisinnaassuseqarluni, AA-p piginneqataassutai aammalu AA-p BB-ip pisassiissutaataanik (10 %-inik) piginneqataassutai tamakkerlutik killiussat aalajangersarneqarsimasut sippussanngilaat.

Ingerlatseqatigiiffik inuilluunniit ataasiakkaat ingerlatseqatigiiffimmut allamut tunngatillugu aalajangiisuusumik inissisimanersut apeqqummut tunngatillugu misissorneqarsinnaavoq ingerlatseqatigiiffik inuilluunniit ataasiakkaat:

- 1) aktiaateqarluni imalunniit piginneqataassuteqarluni ingerlatseqatigiiffimmi allami amerlanerussuteqartutut taaseqataasinnaassuseqarnersut,
- 2) ingerlatseqatigiiffimmi piginneqataassuteqarnersut ingerlatseqatigiiffimmi siulersuisunik, piginneqataassuteqarluniluunniit ingerlatseqatigiiffik siulersuisoqanngippat qullersaqarfianik, amerlanerussuteqartunik toqqaasinnaatitaallutillu tunuartitsisinnaatitaallutik,
- 3) ingerlatseqatigiiffimmi piginneqataassuteqarnersut maleruagassat allatigulluunniit ingerlatseqatigiiffimmi isumaqatigiissuteqarsimaneq tunngavigalugit ingerlatseqatigiiffimmi aalajangiisuusumik sunnuteqarsinnaatitaallutik,
- 4) ingerlatseqatigiiffimmi piginneqataassuteqarnersut ingerlatseqatigiiffimmi piginneqataassuteqartunik allanik isumaqatigiissuteqarsimaneq tunngavigalugu ingerlatseqatigiiffimmi amerlanerussuteqartutut taaseqataasinnaassuseqarnersut, imaluunniit
- 5) ingerlatseqatigiiffimmi piginneqataassutunik pigisaqarnersut tassuunalu ingerlatseqatigiiffimmut aalajangiisuusunik inissimalersimanersut.

Aalajangersagaq taanna malillugu aalajangiisuusumik aamma inissimasoqarsinnaavoq piler-suisunit isumaqatigiissutit, taarsigassarsinermi isumaqatigiissutit isumaqatigiissutilluunniit allat pineqartunik pinngitsuusinnaajunnaarsitsisut allat aqutigalugit.

Aalajangersagaq atorneqartillugu ingerlatsiviup takoqqaassavai pineqartup pisassiissutinit piginneqataassutai assersuummi 1-imi saqqummiunneqartutut, tassuunakkut misissorniarlugu ingerlatseqatigiiffik inuilluunniit ataasiakkaat pisassiissutinit qummut killissarititanik malinnersut. Paasinarsippalli pisassiissutit pigineqartut eqqarsaatigalugit aalajangiisnaalluni inissimasoqartoq ingerlatsiviup naatsorsueriaaseq assersuut 2-mi atorneqartoq atussavaa misissorniarlugu ingerlatseqatigiiffik inuilluunniit ataasiakkaat pisassiissutinit killissarititaasut iluanniinersut.

Nr. 2-mut

§ 15 imm. 3 4-milu atuuttumi aalajangersakkat, avataasiorluni raajarniarnermi taamatullu aamma sinerissamut qanittumi raajarniarnermi pisassiissutinit pigineqarsinnaasunut killiliviusut, § 33 imm. 1 atuuttoq malillugu pineqaatissiisarnermut aalajangersakkamut ilaatinneqarput. Taamaalilluni pissusissamisoortutut isigineqarpoq aalajangersagaq sinerissamut qanittumi qaleralinniarnermi pisassiissutinit pigineqarsinnaasunik killiliinermut tunngasoq taamatuttaaq § 33 imm. 1-imut ilaatinneqassappat, taamaalilluni taassuminnga unioqutitsinerit aamma pineqaatissiissutaasussanngorlugit.

§ 2-mut

Inatsisartut inatsisaata ulloq 1. juli 2012 atuutilernissaa siunnersuutigineqarpoq.